

四庫全書

集部

欽定四庫全書

集部

弇州四部稿卷一百七十二至

四

詳校官侍讀學士<sub>臣</sub>陸伯焜

中書<sub>臣</sub>劉源溥覆勘

總校官原任中

臣王燕緒

校對官庶吉士<sub>臣</sub>陳墉

謄錄監生<sub>臣</sub>薛翰

欽定四庫全書

弇州四部稿卷一百七十二

明 王世貞 撰

說部

宛委餘編十七

仙道鬼神姓名有可考者元始天尊姓樂名靜信見度  
人經玉門子姓王名剛九靈子姓皇名化北極子姓陰  
名恒絕洞子姓李名脩太陽子姓離名明太陽女姓朱

名翼太陰女姓盧名全太玄女姓顓名和南極子姓柳  
名融黃盧子姓葛名起馬名生姓和名君賢張道陵名  
輔劉根字君安尹軌字公度介象字元則見葛翁神仙  
傳河伯姓馮名夷字公子見聖賢塚墓記秦宗新祠頌  
又姓呂名公子夫人姓馮名夷見龍魚河圖太真夫人  
姓王名婉羅見真仙通鑑介子推姓王名光范蠡字少  
伯鬼谷子姓王名詡見神仙傳毛女字玉姜見神仙傳  
醫王子姓古名老師見本草序浮邱公姓李見列仙傳

壺公姓施名存孔子弟子見真誥又姓謝名玄見丹臺  
錄武當戴將軍姓燕名濟洪崖先生姓張後洪崖先  
生亦姓張名氤俱見真仙通鑑東王公名倪字君明西  
王母姓楊名回天翁姓張字刺渴竈神名隗又姓張名  
卓字子郭井鬼名瓊廁鬼名頊又姓郭名登見酉陽雜  
俎

李耳在母胎八十年耳有聃故一名老聃脇尊者存母  
胎六十歲故號難生

日姓張名表字長史日中青帝名圓常元字照龍韜  
赤帝名丹靈峙字綠虹映白帝名皓鬱將字迴金霞黑  
帝名澄潛淳字玄綠炎黃帝名壽逸阜字颯暉像月姓  
文名申字子光月中青帝夫人名娥隱珠字芬艷嬰赤  
帝夫人名翳逸寥字婉延虛白帝夫人名弄素蘭字鬱  
蓮花黑帝夫人名結蓮翹字淳屬金黃帝夫人名青營  
襟字貝定容東嶽姓玄丘名目陸南嶽姓爛名洋光西  
嶽姓浩名元倉北嶽姓伏名通萌中嶽姓角名普生東

海姓閭名內靈西海姓導名洞清北海姓喻名淵元又  
東海姓何名歸君南海姓劉名囂君西海姓劉名漱君  
北海姓吳名禽強君歲星姓碧空名澄瀾字青凝夫人  
姓涵常名寶容字飛雲熒惑星姓渙空名維淳字散融  
夫人姓陽常名華瓶字玄羅太白星姓寥靈名振尋夫  
人姓明常名颯英字靈思辰星姓肇咍名精源夫人姓  
淵常名玄華字龍娥鎮星姓藏睦名耽延夫人姓康常  
名空瑤字非賢雷公江赫沖電母秀文英風伯方道彰

雨師陳華夫俱見道經閻羅王名閃多見佛經

酉陽雜俎云二十八宿昴為首姓鞞耶尼形如剃刀屬  
火畢姓頗羅墮形如笠屬木觜姓毗梨佉耶尼形如鹿  
頭屬日又月之子參姓天婆斯失絺形如婦人鰲屬日  
井姓參形如足跡屬日鬼姓炮波羅毗形如佛胃屬木  
柳姓同參形如蛇亦屬日星姓賓伽耶尼形如河岸屬  
火張姓瞿曇形同井屬福德天翼姓憍陳如形同井屬  
林天軫姓迦遮延形如人手屬毗婆梨帝角姓貨多羅



形同軫屬喜樂天亢姓迦旃延氏姓多羅尼

二星不載形屬

房

姓阿藍婆形如瓔珞屬慈氏天心姓迦羅延形如大麥

屬忉利天尾姓遮耶尼形如蝎尾屬臘師天箕姓持父

迦形如牛角屬清淨天斗姓莫迦還形如人拓石

屬不載

牛姓梵嵐摩形如牛頭屬梵天女姓帝利迦形同心屬

毗紐天虛姓同翼形如鳥危姓單羅尼形同參

屬俱不載

室

姓閻浮都迦屬蛇頭天

蝎天之子形不載

壁姓陀難闍奎姓阿

瑟吒

形屬不載

婁姓阿含婆形如馬頭胃姓馱伽毗形如鼎

足

屬不載

按此稱貝編當是佛書耳而藏經不載又有祭

昂用乳畢用鹿肉觔用果參柳牛用醍醐并鬼張斗用  
粳米和蜜星用烏麻翼用黑豆軫用莠稗角氏用花亢  
用菜豆房用酒肉心危用粳米尾用果根女用烏肉虛用  
烏豆汁室用血奎用酪婁用大麥之說必非佛語也

北斗魁星名第一執陰第二叶詣第三視金第四拒理  
第五防忤第六開寶第七招搖

太乙君名臘天翁姓張名堅前天翁姓劉西王母又名

婉衿 甲子神名弓隆呼之入水不溺甲戌神名執明  
呼之入火不燒

太真科經鬼仙名丙戌日龕生丙午日挺張乙卯日矢  
隋戊午日耳述壬戌日遼辛丑日氐乙酉日聶左丙寅  
日天遯辛卯日懸酉又虫鬼名髮迂迂馮鬼賜蛇鬼例  
石圭

舊讎詞食蛇鬼者申食虎者佛胃食魃者雄伯食祥者  
騰蘭食咎者攪諸食夢者伯倚食磔者強梁祖二食蟲

者死寄生窮奇騰根三

名

王延壽所夢有游光纒殺諸

渠印堯夔瞿將劇摘爪堯峴

二字句 並見酉陽雜俎

鍾山神鼓崑崙山陸吾泐山蓐收日光山計蒙岐山涉

鼉夫夫山于兒海北鍾山燭陰差丘北曰奢比尸大人

北曰肝榆尸朝陽谷曰天旻巴神曰孟涂東海渚偶號

子偶京湯谷奢比尸西海渚奔茲月山曰噓南海渚不

返胡余

名

北海渚禺强櫃海九鳳又强梁

見山海經

五嶽真

形圖東嶽歲崇西嶽善壘南嶽崇靈北嶽晨寧中嶽惔

樊龍魚圖泰山姓圓名常龍衡山姓丹名靈峙華山姓  
浩名鬱狩恒山姓澄名漕淳嵩山姓壽名逸羣呼之令  
人不病東海神姓馮名脩青又名阿明夫人姓朱名隱  
娥一又名阿明南海姓祝名赤夫人姓翳名逸寥一又  
名祝融西海姓勾大名丘伯夫人姓靈名素蘭一又名  
巨乘北海姓是名禹帳里夫人姓結名連翹一又名禹  
疆又河圖東方蒼帝神名靈威仰南方赤帝神名赤熛  
怒中央黃帝神名含樞紐西方白帝神名白招拒北方

黑帝神名叶光記與道經所載俱不同恐俱未可信也  
龍魚圖又有泰山將軍唐臣霍山將軍朱丹華山將軍  
鄒尚恒山將軍莫惠嵩山將軍石玄 太公金匱南海  
神曰祝融東海神曰勾芒北海神曰玄冥西海神曰蓐  
收又不同

鄭君云五兵皆有名誦之亦有驗刀名大房虛星主之  
弓名曲張氏星主之矢名彷徨熒惑星主之劍名失傷  
角星主之弩名遠望張星主之戟名大將軍參星主之

弓神名曲張見龍魚河圖箭神名續長弩神名遠望刀  
神名脫光劍神名飛揚俱見太公兵法船神名馮耳見  
梁簡文記衣服鬼名甚遼見酉陽雜俎

山精名夔水精名罔象山水間精名必方故水精名慶  
忌故池精名意左右有石水生其間其精名喜水有金  
者其精名侯伯一足鼈池精名髮頊三軍之精名賓滿  
木精名彭侯千載木有蟲名賈𧠢狀如豚玉精名岱委  
金精名石塘故宅精名輝文又名山冕可呼使金銀故

臺屋精名兩貴故市精名毛門室精名僕龍丘墓精名  
狼鬼廢丘墓之精名元故道徑精名忌又名作器故井  
精名觀絕廁精名依倚故溷精名卑俱見白澤圖語忘  
敬遺治產鬼名臨產呼之佳釁殺僮亦鬼名見東方  
朔罵鬼書

山中之精如小兒頭者其名跂又名熱內如鼓赤色亦  
一足者其名暉如人長九尺衣裘戴笠者其名金累如  
龍而五色赤角者其名飛飛呼之不為害大樹精名雲



陽山水精如吏人者名四微大蛇著冠幘者名升卿呼  
之吉

百歲狼為女人名知狐為女人名紫

髮神蒼華字大元腦神精根字泥丸眼神明上字英元  
鼻神王龍字靈堅耳神空閑字幽田舌神通明字正倫  
齒神𪔐鋒字羅千心神丹元字守靈肺神皓華字虛成肝  
神龍烟字含明腎神玄冥字育嬰脾神常在字夢停膽  
神龍曜字威明見黃庭內景經

釋氏有姓名可考者阿彌陀佛姓憍尸迦毗婆尸佛尸  
棄佛毗舍佛俱姓拘若利拘留孫佛拘那含牟尼佛迦  
葉佛俱姓迦葉釋迦文佛姓利利又瞿曇氏小字頓吉  
訛為悉達彌勒佛姓慈氏名阿逸多一祖摩訶迦葉姓  
婆羅門大目犍連名胡豆一名萊服根須菩提名鳩留  
產二祖阿難姓利利三祖商那和脩姓昆舍多名舍那  
婆斯四祖優波麴多姓首陀七祖婆須密姓頗羅墮八  
祖佛陀難提姓瞿曇九祖伏駄密多姓毗舍羅十一祖

富那夜奢姓瞿曇十二祖馬鳴大士名功勝十五祖迦  
那提婆姓毗舍羅十八祖迦耶舍多姓蔚頭藍十九祖  
鳩摩羅多姓婆羅門二十一祖婆脩盤頭姓毗舍佉二  
十三祖鶴勒那姓婆羅門二十四祖師子二十五祖婆  
舍斯多姓俱同中國初祖達摩姓刹利帝本名菩提多  
羅二祖慧可姓姬四祖道信姓司馬五祖弘忍姓周六  
祖慧能姓盧名能僧伽大士姓何高坐道人名吉友牛  
頭一祖姓韋二祖智嚴姓華烏窠禪師姓吳名元卿大

慧姓馮南嶽懷讓姓杜永嘉玄覺姓戴石頭姓陳徑山  
大覺姓朱馬祖道一姓馬二祖慧海姓朱南泉姓王龐  
居士名蘊神會姓高仰山慧寂姓葉瀉山靈祐姓趙黃  
蘊姓邢北宗神秀姓李嵩嶽慧安姓衛支遁姓關佛圖  
澄姓帛邢州寺碑則云姓濕竺道潛姓王竺僧度姓王  
名晞道安姓衛一云姓帛慧遠姓賈寶誌姓朱玄奘姓  
陳名緯慧贖姓李萬廻一行俱姓張梁四公一蜀闍一  
鰲杰一薺端一仇膺慧永姓鄱曇邕姓揚僧碧姓傅竺

道生姓魏慧觀姓崔慧義姓梁道淵姓寇慧琳姓劉玄  
暢姓趙僧遠姓皇僧慧姓皇甫寶亮姓徐法通姓褚單  
道開姓孟白足和尚名曇始玄高姓魏僧旻姓孫法雲  
姓周智藏姓顧慧超姓廉慧約姓婁僧稠姓孫僧達姓  
李三車法師姓尉遲忠國師姓冉圭峯姓何宣律師姓  
錢釋智永姓王智果同懷素姓錢齊己姓胡貫休姓姜  
辨才姓袁見佛經典傳燈錄高僧傳法書要錄等書  
自古文章之士稱以仙去者理或有之蓋天地冲美秀

特之氣見予獨多生有所自出有所為則去有所歸固  
其宜耳淮南王與八公上昇東方朔為華陽洞主司馬  
季主委羽托化南華冲虛各備仙職嵇康郭璞並著兵  
解曹植為遮須國王蔡邕為修文郎劉楨徐幹王粲俱  
為侍中王茂弘為尚書令陶隱居為蓬萊都水大監魏  
鄭公為太陽都錄太監李長吉召賦玉樓記杜佑馬總  
為六押大都統白居易為海山院主韓退之為真官冠  
萊公蔡忠惠俱為閭浮提王龐籍為王屋山君韓魏公

為紫府真人石曼卿為芙蓉城主王平甫為靈芝館仙  
官蘇子瞻為奎宿一云紫府押衙劉景文為雷部掌事  
沈文通為地下曹司杜少陵生前為文星典吏及其歿  
也又與李青蓮輩俱優游江湖稱散僊近顧太保鼎臣  
嘗三夢徐昌穀任第二殿帝君後陸詹事深將終之夕  
亦預夢之其事尤奇怪予別有紀

又覽真誥諸書按孔子為太極上真公治九嶷山一云  
廣桑山真君顏回為明晨侍郎後為三天司直一云與

卜商俱修文郎召公為南明公張良為門下侍中張衡  
揚子雲為北方鬼帝治羅酆山周公為北帝師莊周為  
太玄博士嵇康為中央鬼帝治抱犢山屈原為海伯統  
八海王弼為丘監嚴君平尚在峨眉山鬼谷子為太玄  
師治青城山墨翟為太極仙卿郭景純為都錄司命治  
雲臺山周顓為鬼官司命季札為北明公賈誼為西明  
都禁郎以治馬融事不當謫遷太山司馬郝鑒為南門  
亭長臧洪為北斗天門亭長紀瞻為北天修門郎與虞



譚更直守天門顧和為執蓋郎溫太真為監海伯杜預  
為長史王嘉徐庶何晏殷浩俱侍帝晨庾亮為北太常  
前中衛大將軍孔融為後中衛大將軍陶侃為西河侯  
蔡謨為長史荀彧為北明公賓友謝幼輿為左副監  
鬼神中聖者梁成賢者吳季子顏淵卜商為修文郎

十方三世所有一切世界皆悉具四種相劫謂成住壞  
空成而即住住而續壞壞而復空空而又成連環無端  
都將成住壞空八十轆轤結算一十三萬四千四百萬

年為始終之極數所謂一大劫也一日月周行四天下  
光明所照是為一世界如是千世界中有千日月千須  
彌山王四千天下四千大海四千惡道千閻羅王千四  
天王千忉利天至千梵天是為小千世界爾所小千千  
世界是為中千世界爾所中千千世界是為三千大千  
世界如是世界周匝成壞衆生所居名一佛刹

四果預流即須陀洹為初果一來即斯陀含為二果不  
來即阿那含為三果無生即阿羅漢為四果自此以上

獨覺菩提為辟支佛自覺覺他為一切菩薩摩訶薩行  
因果圓滿為諸佛無上正等菩提

佛經如觀音大勢至文殊普賢皆久已造佛境而不肯  
成佛普賢則廣大脩習圓滿未退名未息願文殊則深  
入善權廣化衆生故未取道觀世音於阿彌陀佛滅後  
成等正覺號普光功德山王如來彼佛國土曰衆寶善  
集莊嚴大勢至繼觀音成佛號善住功德寶王如來至  
文殊為七佛導師又云過去無鞅數佛皆其弟子成佛

之時以恒沙諸佛世界為一佛刹其佛刹莊嚴比阿彌陀佛猶大海水比一滴水則諸佛功德未有如丈殊者也

釋迦於諸弟子授記後當成佛至云彌勒發意先我之前四十二劫我於其後乃發道意於此賢劫以大精進超越九劫得於無上正真之道則授記先後又有不可定者釋迦雖先成佛於五濁惡世人壽百歲時彌勒成佛當人壽八萬歲時初會度人九十六億第二會九十

四億第三會九十二億爾後度人無數益佛無高下功德有大小緣與願力所成耳

釋氏謂太昊即應聲大士孔子即儒童菩薩顏子即光淨菩薩老子即摩訶迦葉道家謂尹喜為釋迦佛老子遣化益其徒相傾之談耳

老子在天皇時為通玄天師地皇時為有古先生人皇時為盤古先生伏羲時為鬱華子神農時為大成子祝融時為廣壽子黃帝時為廣成子帝嚳時為錄圖子帝

堯時為務成子帝舜時為尹壽子夏禹時為真行子商  
湯時為錫則子後以商王陽甲十八年降胎至武丁九  
年生在周西伯時為藏史號燮邑子武王時為柱下史  
號育成子成王時為經成子康王時為郭叔子西出關  
自流沙還授禮於孔子在天以玉晨大道君為師在人  
間以常擬為師老子生登行九步步生蓮花左手指天  
右手指地曰天上下唯道為尊釋迦生時登行七步  
一手指天一手指地曰天上下唯我為尊不應相同

如此

老子一名李耳字伯陽二名雅字伯宗三名忠字伯光  
四名石字孟公五名重字子文六名定字元陽七名元  
字伯始八名顯字元生九名德字伯文老子身九變有  
七十二相八十一好七十二相者頭圓為天伏晨蟠起  
玉枕穹窿皓髮如鶴長七尺餘眉有北斗其色翠綠其  
間紫毛長五寸餘虎髭龍髯素潔如絲耳無輪郭中有  
三漏高平於頂厚而且堅兩目日光方瞳綠筋鼻有雙

柱形如截筒口方如海唇赤如丹氣有紫色其香如蘭  
齒如編貝其堅如銀數有六八上下均平舌長且廣形  
如錦文玉泉充溢其味甘香每發妙言聲如金玉顴高  
而起頤方若矩日角月圓金容玉姿龍顏肅肅鳳視閑  
閑額有兕象參午上達天庭平坦金匱充盈腹有白痣  
頤有玉丸項有三約鶴素昂昂垂臂過膝手握十文其  
指纖長爪有玉甲身有綠毛胸有偃骨背負河魁臍深  
寸餘腹軟如綿心有錢文腹有玄痣眼有輪文足蹈二



凡指有乾坤身長丈二偏體芳香面方而澤上下三停  
身如金剛貌若琉璃行如虎步動若龍趨此其相也左  
扶青龍右據白虎前導朱雀後從玄武頭蔭紫文足履  
蓮花頂負兩景五明曜日身有圓象洞照九天兼前仙  
相光色奇妍總八十一謂之好也見法輪經老子史略

般若經如來三十二相足下有平滿相猶如奩底地雖  
高下隨足所蹈坦然等觸第一足下千輻輪文輞轂衆  
相無不圓滿第二手足並皆柔軟如兜羅綿第三兩足

一指間猶如鴈王鞦網交絡文同綺畫第四手足諸指圓滿纖長可愛第五足跟廣長圓滿與趺相稱第六足趺脩高光滿與跟相稱第七雙腓漸次纖圓如鹿王腓第八雙臂平立摩膝如象王鼻第九陰相勢鋒藏密猶龍馬第十毛孔各一毛生紺青宛轉第十一髮毛端皆上靡右旋宛轉第十二身皮細薄滑潤垢水不住第十三身皮金色晃耀諸寶莊嚴第十四兩足兩掌中頸雙肩七處充滿第十五肩項圓滿殊妙第十六膊腋悉

皆充實第十七容儀洪滿端直第十八身相脩廣端嚴  
第十九體相量等圓滿如諾瞿陀第二十頷臆并身上  
半威容廣大如師子王第二十一常光面各一尋二十  
二齒相四十齊平淨密根深白逾珂雪二十三牙鮮  
白鋒利二十四常得味中上味二十五舌相薄淨廣長  
能覆面輪至耳髮際二十六梵音詞韻和雅隨衆多少  
無不等分二十七眼睫猶若牛王紺青齊整二十八眼  
睛紺青鮮白紅環間節皎潔分明二十九面輪猶滿月

眉相皎淨如天帝弓第三十眉間有白毫相柔軟如絲  
白逾珂雪三十一頂上烏瑟膩沙高顯隆圓猶如天蓋  
三十二

祖庭廣記曰先聖生有異質凡四十九表反目注面月  
角日準河目海口斗唇昌顏均頤輔喉駢齒龍形龜脊  
虎掌駢脇參膺圩頂山臍林齒翼臂注頭阜腴堤眉地  
足谷竅雷聲澤面如蒙俱兩目方相也手垂過膝眉一十二  
彩目六十四理立如鳳峙坐如龍蹲手握天文足履度



所莊校然其上復有諸天道經所稱人鳥山在諸天最尊處似不同也

須彌山半四萬二千由旬有四天王天須彌山頂為帝釋天上一倍為夜摩天上為兜率陀天化樂天他化自在天梵衆天梵輔天大梵天少光天無量光天光音天少淨天無量淨天徧淨天福生天福壽天廣果天無想天無煩天無熱天善見天善現天色究竟天無邊空處天無邊識處天無所有處天非想非非想處天凡二十

八天四天以下又有日月星宿天常憍天持鬘天堅首  
天凡三十二種所謂三十三天者即帝釋天宮也見因  
本經與阿含經又不盡同

闕







玉皇上帝初劫為光嚴妙樂國淨德王太子捨位脩道  
八百劫捨位復行忍辱三千二百劫始證金仙為清淨  
自然覺王如來又經億劫始證玉帝位見本行經

大黃皇曾天大明玉完天清明何童天玄胎平育天元  
明文舉天七耀摩夷天名六天欲界壽萬歲虛無越衡  
天太極濛翳天赤明和陽天玄明恭華天曜明宗飄天  
竺落皇笏天虛明堂曜天觀明端靖天玄明恭慶天太  
煥極瑤天元載孔昇天太安皇崖天顯定極風天始皇  
孝芒天太皇翁重天無思江由天上揲阮樂天無極曇  
誓天名十八天色界積億歲皓庭霄度天淵通元洞天  
翰寵妙成天秀樂禁上天右四天無色界積年萬劫無

上常融天玉隆騰勝天龍變梵度天名四梵天壽命無  
有大期為三十二天合清微天禹餘天大赤天及無上  
大羅天為三十六天見靈寶本元經

第一無景無色鬱單無量天第二無形清微天第三無  
精波羅摩禰天第四八色水無量億羅天第五無極洞  
清上上禪善無量壽天第六玄微自然上虛禹餘天第  
七玄清上炁那首約淨天第八梵行上清炁稽那遏淨  
天第九無窮洞虛極上須延天第十玄梵玉虛無精無

羅迦淨明天第十一無玄元達上靈赤天第十二大梵  
元炁離和天第十三無極上虛玉空玄洞寂然天第十  
四梵無色上真炁潘羅玄妙天第十五飛梵行真上玄  
岑謾福德天第十六雲梵流精中元近懣蔭淳天第十  
七玄上洞極無崖不驕樂天第十八大梵玄天元精答  
起近蔭天第十九行梵紫虛上元首帶快見天第二十  
虛梵上清化靈須陀結愛天第二十一上極無景洞微  
化應聲天第二十二大梵九玄中元阿給道德天第二

十三行梵元清下靈炁須遠天第二十四極梵洞微九  
靈炁須帶阿那天第二十五無名至極洞微梵寶天第  
二十六微梵玄天炁帶扇給道德天第二十七虛梵天  
炁蟬然識慧天第二十八空梵中天續元伊擅天第二  
十九太極無崖炁虛洞幽梵迦摩夷天第三十錄梵自  
然識慧入天第三十一玄梵大行無景無所念慧天第  
三十二雲梵上行維先何擅天第三十三無色玄清洞  
微波黎答起天第三十四洞微玄上梵炁阿竭含那天

第三十五玄上祿梵滅然天第三十六極色上行梵泥  
維先若那天亦見道經與琅函經所載又各不同

東方極豪林之墟名呵羅提國人壽四百歲南方極洞  
陽之野其國人壽三百六十歲西方極浩素之壘其國  
人壽六百歲北方極朔陰之庭名旬羅之國人壽三百  
歲上方上清陽灰空之內其國人高上玉皇萬聖帝真  
惟劫為年直下極大風澤名寶真無量國人壽一千二  
百歲見放品經

龍漢之後天地破壞逮至赤明開光天地復位一劫周  
又復破壞逮至開皇天地復位出洞玄靈書又五劫龍  
漢為木劫赤明為火劫延康為土劫開皇為金劫上皇  
為水劫一起一伏周而復始見猶龍傳識者非之以為  
漢武帝時始建有年號何得於窮劫之前預有之乎

九天上第一天名鬱單無量天人壽九百萬歲歲如世  
間五百歲第二天名上上禪善無量壽天人壽三千六  
百萬歲歲如世間一千歲第三天名梵監天人壽一億



五千二百萬歲如世間二千歲第四天名兜術天人  
壽六億八百萬歲如世間四千歲第五天名不驕樂  
天人壽二十三億四千萬歲如世間八千歲第六天  
名化應聲天人壽九十二萬億一千六百萬歲如世  
間六千歲第七天名梵寶天人壽七劫歲如世間五千  
歲第八天名梵摩迦夷天人壽二劫歲如世間千五百  
歲第九天名波黎答怒天人壽四劫歲如世間二千五  
百歲其一天俱別置三天合三十六天見太霄琅書

四天王天壽五百歲以人間五十歲為一日忉利天壽  
千歲以人間百歲為一日毘摩天壽二千歲以人間二  
百歲為一日兜率天壽四千歲以人間四百歲為一日  
化樂天壽八千歲以人間八百歲為一日他化自在天  
壽一萬六千歲以人間一千六百歲為一日摩身天壽  
三萬二千歲以人間三千二百歲為一日梵迦三天壽  
一劫光音二天壽二劫遍淨三天壽三劫果實三天壽  
四劫無想天壽五百劫無造天壽千劫無熱天壽二千

劫善見天壽三千劫大善天壽四千劫色究竟天壽五  
千劫空處天壽一萬劫識處天壽二萬一千劫不用處  
天壽四萬二千劫有想無想天壽八萬四千劫見阿含  
經按佛道二經雖不同大抵言天壽噫壽則壽矣亦終  
有盡也

玄都玉京山前為元京山峨眉山右為廣霞山左為紅  
映山紫空山五間山皆在玉清上大羅下又三秀山在  
玉京前金華山寒童靈山秀華山俱在玉京右三寶山

飛霞山在玉京後浮絕空山在太清中皆真氣所化上  
有宮闕

東嶽廣桑山在東海中南嶽長離山在南海中西嶽麗  
農山在西海中北嶽廣野山在北海中中嶽崑崙山在  
九海中為天地心北大五嶽也方壺山在北海扶桑山  
蓬萊山沃焦山在東海連石山在東南鍾山在北海方  
丈山員嶠山岱輿山俱在大海中酆都山在九壘之下  
玄洲在北海中瀛洲穆洲祖洲俱在東海中鳳麟洲聚

窟洲生洲俱在西海中炎洲在南海中又元洲長洲俱  
在大海中滄海島在大海中高五萬里皆神仙所居五  
帝所理中國五嶽東嶽泰山羅浮括蒼為佐命蒙山東  
山為佐理南嶽衡山霍山潛山為儲副天台句曲為佐  
理中嶽嵩山少室武當為佐命太和陸渾為佐理西嶽  
華山地肺女几為佐命西城青城峨眉蟠冢西玄戎山  
吳山為佐理北嶽恒山河逢抱犢為佐命玄隴空峒陽  
洛為佐理又三佐命山青城山天柱山廬山又有十大

洞天則王屋委羽西城西玄青城赤城羅浮句曲林屋  
括蒼三十六洞天則霍林蓬玄朱陵總真總玄司真虛  
陵大妙洞虛詠真丹山赤水極玄陽明德玄天寶極玄  
好生上元天柱司玄昇真化玄貴玄司真容城太玉太  
秀法樂長耀寶光太上寶玄秀樂長真玉闕寶圭湘真  
太虛洞陽隱觀玄真太元大酉華妙金庭崇妙丹霞仙  
都祈仙青田大鶴太滌玄蓋朱湖太生良常方會白馬  
玄光金華洞光紫玄洞盟皆有真仙主之七十二福地

則地肺仙源玉瑠青嶼崆峒郁木坑武當君山桂源靈  
墟沃洲天姥岑若耶溪巫山清遠東白安山馬嶺鷺羊  
洞真壇洞宮玉清壇靈源陶山爛柯龍虎勒溪靈應白  
水源金精閣阜始豐逍遙東白源鉢池論山毛公壇九  
華桐栢平都綠蘿章觀抱犢大面虎溪元晨德山鷄籠  
玉峯在藍田商谷張公洞長白中條霍山雲山四明在黎州  
維氏臨邛少室翠微大隱白鹿天柱大若巖嶧山西白  
天印金城三皇井沃壤三十六靖廬綿竹紫蓋瀘水丹

陵守玄靈淨送仙契靜凌虛鳳凰子真玄性契玄啓玄  
出谷君平斗山光天眼德尋玄得一啓靈宗華朝真黃  
堂迎真招隱紫虛啓聖啓靈鳳臺東華祈仙元陽東蒙  
貞陽右皆有仙真修煉之跡按記事者可謂詳悉矣然  
滇詔之地碧鷄金馬蒼山洱水勝甲天下又自廣而西  
山皆聳秀黛碧洞多深窈宏靚寧無仙真總理蓋記者  
當其時中國版圖未脩無所考證耳四海之外九天之  
表乃能懸立五嶽羣山之名耶



仙人有赤松子神農時為雨師赤將子輿黃帝時人仕  
堯為火正赤須子秦穆公時為主魚吏張子房欲從赤  
松子游張君房迎赤須子而師之其相類乃爾

弇州四部稿卷一百七十二

欽定四庫全書

弇州四部稿卷一百七十三

明 王世貞 撰

說部

宛委餘編十八

王荊公以誤解三昧字為釋門所譏余久不得頻婆末利花果二字義近於宋板翻譯名義集攷出恍若獲真珠船者因取佛書中有常用而不能解或此解而不知

彼音者悉錄之

多陀阿伽陀如來也阿羅訶應供也三藐三佛陀正徧  
知也亦云正徧覺也鞞修遮羅那三般那明行足也阿  
耨多羅無上也脩伽陀去也路迦憊世間解也富樓沙  
曇藐婆羅提可化丈夫調御師也舍多提婆魔菟舍喃  
天人教師也路迦那他世尊也阿羅訶應供也又殺賊  
也又生觀也佛陀知者也佛覺也罰那尸棄寶髻也提  
洹竭鉢燈也毗婆尸一曰維衛也勝觀也毗舍浮一切

自在也俱留孫所應斷也拘那含牟尼金寂也迦葉波  
飲光也袍休蘭羅大寶也即多寶佛阿彌陀無量壽也  
又為無量清淨阿閃無動也剌那伽羅寶積也提和羅  
耶天人王也盧舍那光明徧照也釋伽能仁也牟尼寂  
默也瞿曇純熟也姓也剌帝利王種也秦言田主須陀  
洹入流也斯陀含一往來也阿那含不來也菩薩菩提  
薩埵自覺覺衆生也文殊師利妙德也邨輸跋陀普賢  
也阿那婆羅吉低輸觀世音也摩訶那鉢大勢至也純

陀妙義也阿迦雲樂王也達磨法也乾陀訶提不休息也維摩羅詰淨名也彌勒燕氏也提婆達多天授也阿差末無盡意也般若拘羅智積也那羅延金剛也阿羅漢總名殺煩惱遠離諸惡堪總供養不受三界生也舍利弗身子也又曰鶩子摩訶迦葉波大龜氏也阿那律無減也須菩提善吉也又空生羅睺羅覆障也阿難歡喜也又無染賓頭盧不動也難陀善歡喜也離婆多星宿也拘絺羅大膝也提婆犀那天軍也喞但羅上也迦

留陀夷黑光也優陀夷出現也須跋陀羅好賢也耶輸

陀羅華色也阿濕縛窣生馬鳴也那伽曷樹那龍猛也

言龍樹誤阿梨跋摩師子鎧也求那跋摩功德鎧也阿僧伽

無着也婆藪盤世親也言天親誤賓伽羅青目也波毗吠伽

清辨也遠磨波羅護法也達磨法也伊濕伐邏自在也

布剌拏圓滿也尸羅跋陀羅戒賢也曷利他如意也鳩

摩羅什婆童壽也佛陀耶舍覺明也曇摩耶舍法稱也

曇摩識法豐也曇無竭法勇也菩提流支覺孝也波羅

末陀真諦也波頗智光也地婆訶羅日照也多羅救也  
波利護也宣灑弟子也比丘乞士也上乞法下乞食也  
芘芻香草以喻僧也沙彌息慈也優婆塞優婆夷清淨  
士女也僧伽衆多也又和合也沙門本名宣摩那拏功  
勞也和尚本名鄔波遮迦于闐翻為和尚此力生又近  
誦也閼梨本名阿遮梨邪軌範也頭陀抖數也又脩治  
也摩摩帝寺主也羯磨事也鐸曷攤小師也阿夷怡新  
學也提多羅咤治國主也忉利本名多羅夜大梵西音



此名離欲又淨行也尸棄火也首陀羅淨居也摩利支  
陽炎也耆婆命也蘇利耶日神也蘇摩月神也印度日  
月也盎哦羅迦火星也部陀水星也勿哩訶娑跋底木  
星也沙乃以宣折囉土星也戌羯羅金星也阿那婆達  
多無熱也夜叉勇健也伊羅臭氣也羅刹連疫鬼也乾  
闥婆香陰也天樂神阿脩羅無端正也又非天迦樓羅  
金翅也緊那羅疑神也波旬本名波卑夜惡也魔登伽  
本性也阿斯陀無比也又端正羼提忍辱也娑數天慧

也摩菟舍喃人也摩菟賒意也僕呼繕那衆生也逋沙  
丈夫也迦羅越居士也婆羅毛道也鄔婆弟鉢父母也  
波帝夫也婆梨耶婦也鳩那羅惡人也拘摩羅童子也  
般吒黃門也扇提羅石女也馱索迦奴也旃陀羅嚴熾  
也即屠者羯恥那煮狗人也須達多善施也耆婆能活  
也婆羅門淨行也梵志淨裔也婆毗迦羅金頭也又黃  
髮蘇氣怛羅善星也彌戾車惡見也薩遮尼乾離繫也  
琰魔亦曰閻羅靜息也又雙王閼黎哆祖父也鳩槃荼

甕形也是魘鬼毗舍闍顏鬼也烏芻瑟摩火頭也惡祁  
尼火神也婆庾風神也鉢健提堅固也婆里旱力士也  
地唼伽長大也分那柯滿也底栗車畜也那伽龍也宮  
毗羅蛟也叔叔邏虬也僧伽彼獅子也迦耶象也瞿摩  
帝牛也婆蹉富羅犢子也竭伽犀也阿濕婆馬也蜜利  
迦羅鹿也悉伽羅野牛也摩斯咤獼猴也舍舍迦兔也  
迦陵頻伽妙聲鳥也嘶那夜鷹也臊陀鸚鵡也僧娑鴈  
也迦頻闍羅雉也鳩鳩咤鷄也斫迦邏婆鴛鴦也舍羅

百舌也迦布德迦鵠也摩由邏孔雀也阿梨耶鵠也姑

栗陀鷲也揭羅闍鵠也毗囉拏羯車婆龜也摩竭鯨也

失收摩羅鰐也泥犁耶無有也

地獄名

阿鼻無間也三摩

耶假時也因陀羅天主也帝也遮閼那王也摩訶三摩

阿羅遮太平等王也薩縛達一切施也尼毗迦與也歌

利惡也波斯匿和悅也阿閼世未生也阿育無憂也尸

羅阿迭多戒日也祇陀戰勝也摩訶摩耶大術也未提

希思惟也索訶一曰娑婆能忍也閻浮提勝金也鬱單

越勝處也羅閱祇伽羅王舍城也拘尸那角城也伽耶

山城也罽賓賤種也烏仗那苑也赭時石國也颯秣建

康國也屈霜你迦何國也

史有何國人

弭秣賀米國也屈支

龜茲也脂那一云支那文物國也蔑戾車邊地也蘇迷

慮即須彌妙高也耆闍崛鷲頭也屈屈咤播陀鷄足也

補陀落迦海島也

今定海中  
山有此名

優留曼陀大醍醐也蘇達

梨舍那善見也額温縛拏馬耳也阿濕磨石也阿迦水

也阿耨達無熱惱也殑伽天堂也婆竭羅鹽海也賀邏

馱池也提洲也婆那林也畢利叉高顯也阿輸迦無憂  
花樹也娑力叉樹也軻梨羅苦梗木也多羅舊名息多  
岸也尸多婆那一名尸陀寒林也鞞鐸佉嚼楊枝也頗  
羅果也菴羅柰也頻婆相思也訶梨勒天主特來也播  
囉師胡桃也鎮頭迦柿也篤迦栗也居陵迦李也布瑟  
波花也弗把提天花也末利花柰花也曼陀羅雜色也  
優鉢羅黃白色花也婆羅羅重生也分陀利白蓮也漚  
鉢羅青蓮也鉢特摩赤蓮也拘某陀黃蓮也乾陀羅耶

香也梅檀離垢也瞻博一曰瞻蔔黃色香花也迦算藿  
香也吐嚕瑟劍蘇合也杜嚕薰陸也突婆茅香也羯布  
羅龍腦也薩闍羅婆白膠也莫莫訶婆伽麝香也多揭  
羅芸香也阿伽嚕沉香也拙具羅安息也茶矩磨鬱金  
也蘇伐羅金也跋折羅金剛也阿路巴銀也鉢擺娑福  
羅珊瑚也阿濕摩揭婆琥珀也牟婆洛揭拉婆車渠也  
摩羅伽隸瑪瑙也摩尼珠名離垢也鉢摩羅伽赤色珠  
也甄叔迦赤寶也吉由羅瓔珞也彌訶金帶也曷剌怛

那揭婆寶臺也洛叉十萬也俱胝百億也那由它萬億也阿僧祇無央數也佉梨斛也婆訶筭也受二十斛摩偷又宰唎翻酒也毗嵐迅猛風也差羅波尼灰水也朱利草賊也薩哀煞地蛇藥也優檀那印也婆利曲鈎也亟縛屣鞞也含樓伽藕根也俱蘭吒色也伊尼延金色也蘇樓波妙色也尼羅青也阿羅那赤也盧醯咀迦又迦沙野同叔離白也訖里瑟拏黑又迦茶里也健陀羅黃也羅差紫也永伽羅蒼也脩多羅又素怛纜經也毗



索耶善治也又為毗尼滅也律也阿毗曇無比法也又奢薩怛羅論也俱舍藏也祇夜重頌也和伽那授記也尼陀那因緣也阿波陀那譬喻也伊帝目多伽本事也闍陀伽本生也毗佛略方廣也阿浮達摩未曾有也阿含本阿笈多教也又法歸也首楞嚴健相也楞伽本駿迦不可往也薩達磨芬陀利妙法蓮花也般丹佛立也摩訶袒持大秘要也孟蘭倒懸也本名烏藍婆拏救倒懸也脩跋拏娑頗娑鬱多摩金光明也曇無德本曇摩

翹多法密隱覆又法藏也薩婆多一切有也摩訶僧祇  
大衆也犍度本婆犍圖法聚也瑜伽師地相應也毗婆  
沙廣解也鼻婆沙種種說也毘勒篋藏也毘婆闍婆提  
分別論也波羅蜜木叉解脫也三昧調直定也又正定  
也正受也末底慧也檀那布施也尸羅清涼也羼提安  
忍也又忍辱也毗梨耶精進也禪那精進也般若智慧  
也阿羅蜜遠離也波羅蜜度彼岸也波羅伽同豆佉苦  
也三年提耶集也尼樓陀滅也未伽道也奢摩它止也

毗婆舍那觀也憂畢又平等也毗跋耶斯四念處也摩  
奴是若如意也娑羅力也尼坻願也薩婆迦摩樂欲也  
浮曇末至誠也懺摩本又摩忍也地底迦有愧也波娑  
提伽即梵摩清淨也羯摩業也又事也布薩淨住也鉢  
刺婆刺拏隨意也唄匿止也又梵唄梵音敗音讚歎也婆  
闍尼娑婆唵聲音也鉢底婆辨才也槃那寐訛曰和南  
我禮也那謨悉羯羅禮拜也南無或那謨或南摩歸命  
也又恭敬也歸命覺也信從也彌羅慈也迦樓那悲也

阿檀或阿捺摩無我也阿蘭那無諍也又寂淨也默那  
演那靜慮也毗怛迦尋也毗遮羅伺也三跋羅護也三  
跋致發趣也達嚩財施也摩訶般涅槃那大滅度也又  
圖寂也涅槃言不生樂言不滅阿耨多羅三藐三菩提阿  
無也耨多羅上也三藐正三徧也等也菩提覺也又道  
也阿婆磨無等等也目帝羅解脫也阿鞞跋致不退轉  
也膩地依也陀羅尼能持也又遮持也薩怛多般怛羅  
白傘蓋也蘇盧都訶決定也胡蘇多除一切鬱蒸熱惱

也蜜奢毘金鼓也但你也他所謂也娑婆訶善說也又  
解去也尔焰所知也多伽梢根智也漚和俱舍羅方便  
也阿提初也阿耨波陀不生也羅闍垢也波羅末陀第  
一義也遮梨夜行也那不也邏求輕也陀摩善也婆陀  
縛也茶闍它不熱也沙六也和波陀語言也多它如也  
夜他跋實也吒婆障礙也迦邏作者也娑婆一切也磨  
磨迦羅我所也迦陀底也闍提闍羅生也馱摩法性也  
賒多寂滅也义耶盡也若

闍

也阿施義也娑伽破也

伽車提去也火夜喚

闕

那厚也歌大

衆也遮羅地動也

闕

那摩名也

波陀句也跋渠品也都羅喜也摩訶羅無知也喝薩訛

也娑度善哉也阿呼奇哉也闍維本荼毗焚燒也陀呵

燒也僧柯慄多弭有為也般遮于瑟五年一大會也般

遮于旬五神通人也

似以三字釋五而一字貫三四義

四毗舍羅無慳

義也沒栗度更也麗捌毗細滑也烏瑟膩沙佛頂也母

陀羅結印手也迦私光也舍利骨身也頻婆帳者身影

也離佉書也毗伽羅也攝拖苾馱聲明也韋陀智論也  
僧佉論本僧企耶數術也鞞患無勝也勒沙婆苦行也  
路伽耶順世也又善論也逆路伽耶陀左世也又惡論  
也殺三摩娑離合也達梨舍那見也尼延底深入也羯  
吒斯愛也提鞞沙嗔恚也慕何癡也何耆毗伽邪命也  
阿羅伽欲也奢佉諂曲也質多耶心也污栗馱草木心  
也紇利陀耶肉團心也未那意也阿陀那執持也菴摩  
羅清淨識也乾栗陀耶真實心也塞健陀蘊也鉢羅味

奢入也馱都界也歌羅邏凝滑也頸部曇胞也蔽尸凝  
結也健男凝厚也鉢羅奢佉形位也娑路多羅戍縷多  
能聞也迦羅尼羯羅拏能嗅也砥若時吃縛能嘗也鼻  
豉迦種也攝提假也優陀那丹田也阿那遣來也入息  
般那遣去也出息烏波有也薩迦耶薩無常也佉那生  
也未刺謫生死也生死總名又曰閼提閼迦摩羅黃病  
也阿薩閼不可治病也珊若娑廢風病也剌摩本掣多  
羅丈田也刺瑟胝竿也即幡柱也羅摩院也招提本名



招闢提奢四方僧物也訛為招提翻作別房施又對面  
施阿蘭若遠離處也一作閑靜處僧伽藍衆園也那爛  
陀施無厭也林微尼解脫處也阿奢理貳奇特也窣堵  
波方墳也又圓塚又高顯也梵名塔婆發訛為浮圖浮  
圖者聚相也支提可供養處也舍磨奢那塚也健陀俱  
胝香室也滿荼邏壇也脫闍幢也拘吒迦小舍也健推  
磬也又鐘也舍羅籌也隙棄羅錫杖也軍持瓶也本名  
拈稚迦甕瓦淨用銅鐵觸用鉢里薩羅伐拏濾水羅也

鉢塞莫數珠也鉢多羅應器也即鉢也徒銘淺鐵鉢也  
俱夜羅隨鉢器也震越衣服也袈娑去穢也一云不正  
色一云離染服僧伽梨合也重也又重複衣鬱多羅僧  
上著衣也即七條安陀會中宿衣也鉢吒縵條也一幅  
氎成尼師壇坐具也僧祇支掩掖也泥縛些那裙也舍  
勒內衣也迦絺那功德衣也憍奢耶蟲衣也蠶所成屈眴  
大細布也睒婆木綿也迦波羅刼貝也即木綿迦隣陀  
衣細錦衣也兜羅綿細香也一翻揚華欽跋羅毛也頭

鳩羅細布也芻摩麻衣也那波吒絹也摩羅蔓也逋沙  
他齋也烏瞀沙它受齋也蒲闍尼正食也佉闍尼不正  
食也半者蒲善尼五噉食也半者珂但尼五嚼食也佉  
陀尼可食物也鉢和羅自恣食也分衛乞食也但鉢那  
麩也迦師錯麥也

安居者南山云形心攝靜為安要期住此為居結夏者  
通制三時偏約夏月一無事遊行妨脩出業二損傷物  
命違慈實深三所為既非故招世謗又云夏中除大小

便餘則跣趺而坐所以但結三月者前為開後為成供  
身衣食故也四月十六日是前安居十七日已去至五  
月十五日名中安居五月十六日名後安居一云前三  
月則從五月十六日至八月十五日後三月則從六月  
十六日至九月十五日入則為結夏出則為解夏其云  
坐夏坐臘皆非也臘不是冬月義接也謂新故之相接  
其云僧臘蓋亦一歲新故相接耳

因果經云二月八日佛誕生摩騰云周昭王二十四年

甲寅之歲四月八日生周書異記同唐費長房則云周  
莊王它十年四月八日生什法師石柱銘同趙伯休記  
云周貞定王二年甲戌至法顯則云殷世武乙二十六  
年甲午生鷲嶺聖賢錄則說佛生時有八別一夏桀時  
二武乙時三周昭王時四穆王時五平王時六桓王時  
七莊王時八貞定王時又云周正四月非今四月也然  
則今之定以為昭王甲寅四月者雖於衆說為長亦未  
確然

僧食稱齋亦取齋戒之義云齋也日未中與過中皆不  
齊故不食所謂五正食則麩飯乾飯魚肉也一云噉食  
五不正食枝葉花果細末磨食也一云嚼食

法華經佛告彌勒日月燈明佛入滅弟子妙光菩薩持  
妙法蓮華經滿八十小劫為人演說妙光弟子八百中  
有一人號曰求名貪著利養雖復讀誦衆經而不通利  
多所忘失故號求名是人亦以種諸善根因緣故得無  
量百千萬億諸佛供養恭敬尊重讚歎彌勒當爾時妙

光菩薩豈異人乎我身是也求名菩薩豈異人乎汝身是也至緣起經則云釋迦彌勒脩菩薩道時俱當成佛釋迦以精進故超三劫彌勒即求名以貪供養故退三劫其不同乃爾夫既精進可超貪供可退則佛所懸記弟子當來成佛摩訶迦葉須菩提大迦旃延大迦葉富樓那彌多羅尼子憍陳如比丘等又豈無一二進退於其間耶且先許者佛壽十二小劫其次則二十四小劫最後則無量阿僧祇劫而不以學業功行為次第皆不

可曉也

十大弟子舍利弗智慧目捷連神通大迦葉頭陀阿那律天眼須菩提解空富樓那說法迦旃延論義優婆離持律羅睺羅密行阿難陀多聞益亦吾孔門十哲之擬也

提婆達多生身謗佛入地獄尚云不減四禪天樂又云佛於異類中行及脩菩薩道時世世為讎後亦懸記成佛以其世世相值若曰他山之石攻玉云耳夫成佛是



真則何以戒人謗法使謗法是假則何以止謗法之人此又不可曉也

韓退之言漢明帝時始有佛法在位止十八年宋齊梁陳事佛漸謹梁武在位四十九年餓死臺城國亦尋滅此不足以服憲宗心也自憲宗前赫連勃勃畫佛於背迫僧禮拜為雷震死子昌滅佛教身死國滅魏太武誅僧毀寺見弑人手周武帝除佛法次年晏駕子天國亡自憲宗後武宗去塔寺亦以次崩無子宋徽宗改佛為

金仙約僧留髮尋有播遷之禍以唐文皇宋藝祖我太祖太宗之明斷隋文帝之威果而不能不歸心釋教此必有內契於心者矣

譯經圖記云明帝永平三年庚申帝感異夢勅郎中蔡愔中郎將秦景博士王遵等十八人西尋佛法至印度國請迦葉摩騰竺法蘭用白馬馱經像以十年丁卯至洛陽帝悅造白馬寺譯四十二章經十四年正月一日五嶽道士褚善信等不悅朝正之次表請較試勅遣尚

書令宋庠引入長樂宮詔以十五日集白馬寺南門信等以靈寶諸經置道東壇上帝以經像舍利置道西七寶行殿上信等遶壇泣懇天尊以梅檀香燒經冀經無損並為煨燼其諸昇天入火履冰隱形諸術皆不復能善禁呪者亦呼策不應太傅張衍語信曰所試無驗即是虛妄宜就西域真法時南嶽道士費叔方慙忸自感而死時佛舍利光明五色直上空中旋環如蓋徧覆大衆映蔽日輪摩騰先是阿羅漢即以神足游空飛行坐

臥神化自在時天雨寶華及奏衆樂摩騰復坐法蘭說  
世後宮陰夫人王婕妤等百九十人司空陽城侯劉善  
峻等二百六十人四嶽道士呂慧通等六百二十人京  
都張子尚等三百九十一人俱出家引吳書闕澤對吳  
主云褚善信費叔方自感而死為證攷之漢史明帝自  
元年太傅鄧禹薨後絕不置此官三公中亦無所謂張  
衍者十四年衛尉趙憲行太尉司空為年融亦不聞有  
所謂劉善峻也且道教符籙之興起於張陵盛於寇謙

之而極於杜光庭當時豈知所謂二教亦豈以白馬一  
寺而道士遂與之鬪法哉此既云永平十四年以靈寶  
諸經鬪法而廣弘明集云靈寶創自張陵赤烏始出上  
清肇自葛玄三洞造於鮑靚其自相矛盾可見

從佛出十二部經從十二部經出九部脩多羅從九部  
脩多羅出方等從方等出摩訶般若從摩訶般若出大  
涅槃譬言之從牛出乳從乳出酪從酪出生酥從生酥出  
熟酥從熟酥出醍醐用脩之譚苑醍醐蓋本此也噫豈

其能醍醐哉

哀歎品曰云何為秘密之藏猶如伊字三點若並則不成伊縱亦不成如摩醯首羅面上三目乃得成伊三點若別亦不成伊按伊字六有兩伊舊伊橫豎斷絕新伊下草相連細畫蓋梵書也苑咸書三點成伊本此

諸天命欲終時五死相現一華冠萎二腋下汗出三蠅來着身四見更有天坐已坐處五自不樂本座見然大論又曰五衰一衣服嚴具出非愛聲二自身光明忽然

暗劣三於沐浴位水滴着身四本性器馳今滯一境五  
眼本凝寂今數瞬動此五相現非定命終遇勝善緣猶  
可轉復有五種大衰相現一衣染塵埃二華蔓萎悴三  
兩腋汗出四臭氣入身五不樂本座此五相現必定當  
死益大同小異

苑咸詩又有蓮花卍字總由天按卍字本弘佛曾前吉  
祥相也又魯字佛髮右旋而結作此形亦吉祥相也中  
國呼為萬音疑亦意會耳

涅槃經閻浮界內有振旦國我遣三聖化導人民慈哀  
禮義具足法行經孔子光淨菩薩老子迦葉菩薩顏子  
月光菩薩

祖有兩龍樹西土少年時博綜藝術與同志三人學隱  
身術入王宮數月美人懷妊者衆王用智臣以細土置  
門中見四人足跡乃令勇士揮劍空中斬三人首近王  
七尺刀所不至龍樹歛身依王得免悔而入山成道後  
化南天竺王問諸天何所作為答曰天今與阿脩羅戰



須臾空中刀劍及脩羅刀鼻相繼下王乃驚服又與善  
呪婆羅門角力婆羅門化大池蓮華坐其上龍樹化白  
象入池鼻舉蓮花高擲婆羅門傷背而伏蓋道家葛仙  
公左元放之流也東土龍樹尊者見入楞伽經善逝涅槃  
後未來世當有南天竺比丘厥號龍樹得初歡喜地  
往生安養國按龍樹作大無畏論而東土所稱無畏論  
主又不載事蹟即此龍樹也

天台智者智顗傳開皇十二年至當陽上金龍池月夜

見二人威儀如王者一人長而美髯豐厚少者秀發前  
致辭曰予即關羽漢末紛亂時事相違有志不遂死有  
餘烈故王此山大德聖師何枉神足師曰欲於此地建  
立道場神曰願哀憫我愚特垂攝受此去一舍山如覆  
船其土深厚弟子當與子平建寺化供護持佛法願師  
安禪七日以須其成師既出定湫潭千丈化為平陸棟宇  
煥麗巧奪人目神即受師五戒乃致書晉王廣上玉泉  
伽藍圖王答既事出神心理生望表即當具奏佳號奏

賜名玉泉寺今寺有塑羽像以為伽藍神蓋本此也

玄光辯惑論攻道家言張陵為蟒蛇所喻子衡奔尋無處假設權方生縻鵠足置石崖頂剋期告衆云正月七日天師昇玄米民山獠蟻集闕外方夜衡入久之乃出詭稱云云密抽游胃鵠直衝虛空與李膺蜀中記略同其所著三逆妄造黃書呪癩復勤勤行此又有所謂塗炭齋者驢輾泥中黃鹵泥面擗頭懸仰埏埴使熟又云吳陸脩靜者甚知源僻猶塗揆額懸縻而已吾嘗跋慧

遠白蓮社圖以脩靜相去百年為疑審爾脩靜雖同時  
慧遠恐不引之入社矣僧道宣又稱脩靜因梁武捨道  
奉佛走入齊天保六年與沙門較法遇醉僧曇顯不勝  
伏法遂革道教後考吳志則云脩靜字元德郡人棲廬  
山白雲寺與慧遠師結白蓮社宋文帝表其高風作停  
霞寶贊使徐湛宣旨留之不可太始三年作崇虛館通  
仙堂強招之使講道元徽五年化去春秋七十有二謚  
簡寂先生詔以所居為簡寂觀然則江左蓋有兩陸脩

靜而廬山十八賢與虎溪三笑之疑不待辨也但修靜  
詔謚如此而正史不載未曉其故

釋道宣記傳奕范陽人入周通道觀隋開皇十三年與  
中山李播請為道士十七年事漢王諒諒反遷岐州唐  
初為太史令武德四年上減省寺塔僧尼等十一事高  
祖覽之廢諸州寺塔又云奕本道門起家貧賤武德之  
始西來入京謁道王歸歸左道之望延奕私宅待以上  
賓三數日間遂通其婦入堂笑語曾不避歸有兒子為

寺僧見而發之奕大恚恨又引唐臨冥報記貞觀十四年奕暴病卒初與道士傅仁鈞薛贍善奕鈞先亡贍夢見鈞曰先所負錢可付泥問為誰曰傅奕也又馮長命夢見亡人問傅奕受何報曰已配越州作泥人矣泥人者泥黎中人也蓋地獄名矣按奕相州鄴人事漢王諒為儀曹諒反以直言不從坐徙扶風高祖為扶風太守善之即位拜太史丞以庾儉薦為令數排毀儉儉不為恨武德七年上書詆浮屠法又上十二論言益痛切帝

善之未及行貞觀十三年卒年八十五病未嘗問醫忽  
酣臥蹶然起曰吾死矣乎即自誌曰傳奕青山白雲人  
也以醉死嗚呼奕武德初入京六十餘近七袞矣豈有  
淫王歸婦事蓋釋門恨而醜詆之故也第一時諸僧辨  
奕者皆力言道法之污罔宜奕於彼教陰有黨耶  
釋有兩慧遠一則開廬山之教於宋初一則護承光之  
法於周武

續高僧傳護法以曇無最為首在魏正光元年與清通

觀道士姜斌上殿講法帝問佛與老子同時否姜斌曰  
老子西入化胡成佛佛為侍者出開天經明是同時最  
問老子同何王而生何年西入斌曰當周定三年在楚  
國陳州苦縣九月十四日夜生敬王元年年八十五與  
散關令尹喜西入化胡最曰佛當周昭王四月八日生  
穆王五十二年二月十五日滅度經三百四十五年始  
至定王三年方生至敬王元年凡經四百三十年始與  
尹喜西遁何得言同時乎尋究開天經緣歷斌不能對



配徙馬邑其語如此絕無精義可采又記一小說逝者見曇無讖至閻羅王所責以諍論不誠心向道送至一黑門似非好處傳亦稱後不測所終豈亦為是耶

傳又稱靜謁者以周武將滅佛法上書力諍不得請與道宗人並烹以別真偽帝不聽卒滅之遂歸隱太乙山錫谷中厭身情迫勅遣侍者跏坐磐石自條身肉段段布於石上引腸挂於松枝五臟都皆外見自餘筋肉手足頭面齧折都盡以刀割心捧之而卒次日合掌捧心

跏坐如初所傷餘骸一無遺血白乳滂流凝於石上仍留  
偈於壁夫佛教自殺者不復人身此殆不可思議矣  
諸有謂佛法入中國不始於漢明者以列子西方有聖  
人老子師竺乾及武帝得休屠王祭天金人為證按宣  
律師傳有一天人姓陸名元暢來謁律師云弟子是周  
穆王時生在初天本是迦葉佛時天為通化故周時暫  
現所問高四士臺者其本迦葉佛於此第三會說法度  
人至穆王時文殊目蓮來化穆王從之即列子所謂化

人者是也化人示穆王云高四臺是迦葉佛說法處因造三會道場至秦穆公時扶風獲一石佛穆公不識棄馬坊中穢污此像護像神瞋令公染疾公又夢遊上帝極被責疏覺問侍臣由余便答云臣聞周穆王時有化人來此土云是佛神穆王信之於終南山造中天臺高千餘尺基址見在又於倉頡臺造神廟名三會道場公今所患殆非佛為之耶公聞大怖語由余曰吾近獲一石人衣冠非今所製棄之馬坊得非此是佛神耶由余

聞往視之對曰此真佛神也公取像澡浴安清淨處像  
遂放光公又怖謂神瞋也宰三牲以祭之諸善神等擊  
棄遠處公又大怖以問由余答曰臣聞佛清淨不進酒  
肉愛重佛命如護一子所有供養燒香而已所可祭祀  
餅果之屬公大悅欲造佛像絕於工人又問由余答曰  
昔穆王造寺之側應有工匠遂於高四臺南村內得一  
老人姓王名安年百八十自云曾於三會道場見人造  
之臣今年老無力能作所佳村北有兄弟四人曾於道

場內為諸匠執作請追共造依言作之成一銅像相好  
圓備公悅大賞賚之彼人得財並造功德於土臺上造  
重閣高三百尺時人號之高四臺或曰高四樓其人姓  
高大者名四或曰兄弟四人同立故也或取大兄名以  
目之故有高四之名至今稱也然則秦穆公時佛法已  
入中國矣宣師不應誕

傳燈錄謂二祖慧可初事達磨嘗斷一臂置前達磨知  
是法器始傳以祖心印及偈伽經至續高僧傳則云周

滅佛法可與林法師同學共護經像遭賊斷臂以法御  
心不覺痛苦火燒所處血斷帛裹乞食如故曾不告人  
後林又被賊斫其臂叫號通夕可為治裹乞食供林林  
怪可手不便怒之可曰餅食在前何不自裹林曰我無  
臂也可不知耶可始曰我亦無臂復何可怒二記皆開  
士所述而慧可一臂一以為求法一以為遇寇不同乃  
爾

弇州四部稿卷一百七十三

欽定四庫全書

弇州四部稿卷一百七十四

明 王世貞 撰

說部

宛委餘編十九

漢武內傳王母設膳於漢武乃命王子登彈八音之璫  
董雙成吹雲酥之笙石公子擊昆庭之鐘許飛瓊鼓震  
靈之簧阮靈華拊五雲之石范成君擊洞陰之磬段安

香作九天之鈞武夷山古記秦始皇二年八月十五日  
武夷君魏子騫會鄉人於幔亭命張安陵打引鼓趙元  
奇拍副鼓劉小禽坎鈴鼓曾少重擺鼗鼓喬知滿振嘈  
鼓高子春持短鼓鮑公希吹橫笛何鳳兒拊節板東幄  
奏賓雲左仙之曲次命董嬌娘彈坎篴謝英妃撫長琴  
呂荷香憂國腹即琵琶黃次姑噪悲慄即篳篥秀淡鳴洞簫  
宋小娥運居巢笙羅妙容揮鉞鉞銅鉞西幄奏賓雲右仙  
之曲行酒進食乃令彭令昭唱人間可哀之曲二事及



樂器名多異因記於此

四真降南嶽魏夫人各有歌太極真人方諸青童扶桑神  
五清虛真人王母贈魏夫人歌雙禮珠彈雲璈而答

高仙盼遊洞靈見上清元君龜山君二真乃命持丈王  
延賢于廣運等彈雲林琅玕之璈安德音范四珠擊昆  
明之筑左抱容韓賢賓吹鳳鸞之簫趙運子李慶王  
拊流金之石辛白鵲鄭辟方燕婉來回雙連等四人合

歌

九華安妃降楊司命有紫微王夫人右英王夫人桐栢  
山真人清靈真人中候夫人昭靈李夫人太虛南嶽真  
人

赤松子

方諸青童南極紫元王夫人俱作歌

又楊君夢遊蓬萊山有石慶安張誘世許玉斧丁瑋寧  
俱作詩此外青靈大君西成真人王小有真人王方諸  
東華靈妃太微玄清左夫人禁元中郎將辛玄子定錄  
中候茅季偉俱有詩

周子良為華陽弟子有保命府丞樂道士嵩高馮真人

張仙卿洪先生華陽童俱授詩

神仙之跡未有如晉許氏之盛而亦未有如許氏之不  
相蒙者陶貞白極重真誥真誥稱許穆與兄揆次兄虎  
牙子玉斧門客楊羲俱為仙官而羲穆最貴中有許邁  
與穆二書貞白所著許長史碑穆世名謚仕至護軍長  
史散騎常侍得道卒年七十二揆世名毗虎牙名聯皆  
得道又云第四兄字遠遊永和四年嘉遁不返晉書許  
邁傳字叔元一名快句容人後名元字遠遊與王右軍

善遊名山不知所終好道者謂之羽化然不為謚作傳亦不及其仙事而今世所崇奉許真君者名遜據列仙傳為遠遊弟嘗與郭景純俱參王敦軍切諫景純兵解而真君隱去以陰功重僊品最高為九天採訪使真誥又略不之及何也晉史既非隱書真誥亦是真文貞白又琅然如彼而許真君又赫然如此都不相及何也右軍有元度腫至一帖黃長睿揚用脩遂引以駁晉史謂元度實病死乃云服巨勝仙去不知元度乃許詢非邁

也續晉陽秋曰詢字元度高陽人風情簡素辟司徒掾不就早卒世說盛稱之晉史既不為詢作傳僅附見孫綽傳中亦無服巨勝語此皆不可曉者

抱朴子載華譚字令思高才洽聞之士也而事之不經者多所不信後有道士說黃白之方乃試令作之曰以鐵器銷鉛散藥投中即成銀又銷此銀以他藥投之乃作黃金又從此道士學徹視之方行之未百日即卧便見天文及四隣了了不覺復有屋室籬障又妾石瑤華

者已死乃見形與之言語如平生又祭廟聞廟神答其拜牀似動有聲譚乃歎曰世間乃定無所不有五經雖不載不可便以意斷也真誥云華僑者晉陵冠族世事俗禱初頗通鬼神常夢同共饗馥每爾輒靜寐不覺醒則醉吐狼籍俗神恒使其舉才用人前後十數若有稽違便坐之為譴僑忿患遂入道於鬼事得息漸漸仙真來遊始亦止是夢積年乃夜半形見裴清靈周熱陽至皆使通傳音意於長史而僑性輕踈多漏說冥旨被責

仍以楊君代之僑後遷江城縣令家因居焉今江乘諸  
華皆其苗裔也二華事頗相類又皆涉仙道因筆於此  
以俟其後人補譜傳之遺

真誥所載楊羲仙階甚重第運題象首章仙女萼綠華  
以升平三年十一月十日夜降羊權家贈詩一篇并致  
火浣布手巾一枚金玉條脫各一枚又興寧三年乙丑  
六月二十五日夜紕微王夫人同金臺李夫人少女九  
華真妃降楊室備言真妃服飾之美年齡之少又顏容

瑩朗鮮潔如玉五香馥芬以一枚乾棗食之所謂得叙  
姻緣懽願於冥運之會依然松蘿之纏及臨別小留在  
後執手下牀恐非宜也惟相贈二詩有相攜雙清內上  
真道不邪又上道誠不邪塵滓非所聞庶幾不涉魔境  
耳至六月二十六日口授書亦然而加詳僞以泄漏被  
斥楊君筆之書乃不罪何也

第二卷有九華安妃此即林靈素所稱明節劉后者  
也



第四卷保命君答許長史云郝回父無辜慘人數百口  
取其財寶殃考深重惋主恒訟訴天曹法應滅門但回  
修德既重一身免脫子孫豈得全耶回當保其天年但  
仙道之事去之久矣回方回也父即鑒也陶隱居注鑒  
清儉有志行不應殺掠如此或是初渡江時攝併所致  
不爾則在涼時殺賊有濫也又小君說郝鑒今在三官  
為劉季姜所訟爭三德事却後紫微夫人又言郝回若  
得道者乃當為太清監隱居又注鑒年七十餘終即保

為禮官職頗矛盾不可曉

又真誥內保命君云左理中監大府長史韓崇字長季  
吳郡毗陵人累遷汝南太守年七十四得隱解法入大  
霍山注晉陵上有韓墓右理中監王瑋玄是楚莊王時  
侍郎受術於玉君注若是春秋時楚莊王者疑侍郎之  
官不似古職漢楚王無莊謚後任者劉翊字子翔潁川  
人舉計掾到長安拜郎中遷陳留太守行達陽平遇馬  
皇先生將入桐栢山中注漢書字子相潁陰人為郡功

曹拜議郎出為陳留太守出關殺車牛以濟知故不繼  
遂俱餓死定錄府執法郎淳于斟字叔顯會稽上虞人  
作徐州縣令大將軍辟掾後入烏目山中注叅同契淳  
于叔通舉方士為洛陽市長太極仙侯張奉字公先河  
內人太傅袁隗妻以女後棄世入剡山得道領九宮尚  
書注魏書張範字公儀河內脩武人太尉袁隗妻以女  
不受仕為議郎建安十七年卒弟承字公先累拜趙郡  
太守隨魏武西征病亡王脩傳往來南陽止張奉舍然

此張奉河內人明晨侍郎張桃枝司隸校尉朱寓季陵  
母與陳蕃同誅注寓故在八俊列同李膺杜密下獄死  
不與陳蕃同誅中君言童初府上帥劉寬文饒為司徒  
太尉年七十三過青谷先生授杖解法注為太尉中平  
二年卒年六十三又真誥許長史七世祖肇字子訶注  
檢譜七世祖名敬字鴻為光祿勳拜司徒應劭漢官儀  
載崔瑗表許敬年且百歲猶居相位其不能無矛盾如  
此又注謂蜀司徒許靖字文休是長史六世族祖徵士

邵字子將是五世族祖尤誤按文休於子將為從兄俱知名並有人倫之稱而私情不協子將為郡功曹排擯不得齒叙以馬磨自給今注似靖與劭父子何也其漏誤如此黃長睿乃欲引以證黃庭之誤耶

古稱生為名臣歿為名神其最炳著者北土則城陽景王江左項王神於吳興尤烈及江神伍相員按景王即朱虛侯劉章平呂氏之亂封王之二年而卒僅可二十四五歲項王據吳興太守正衙為祠太守避不敢居每

履任則殺車牛以祭之不然立死其幸而不死者一二  
人耳而臨汝侯蕭猷至每享神輒對飲盡歡竟日比散  
神像亦色赭又嘗為猷破大盜見猷傳員素車白馬驅  
江潮神亦著唐狄仁傑采訪江南盡毀諸淫祀獨留員  
及秦伯季札祠而移檄項王喻以大義乃毀其吳興廟  
自是絕胙饗而城陽祠久不著伍相靈亦漸消猷豈鬼  
神之氣不復能持久耶漢壽亭侯初不聞為神後至  
隋世於荊州玉泉寺見靈跡尚未表章至宋崇寧時以

破蚩尤復鹽池見靈遂封為崇寧真君今香火徧天下  
兒童婦女皆知崇重則又久而始見神不可曉也

伍員死而為江海之神見古本吳越春秋越絕書錄異  
記吳會分地記水經注史記正義其事甚詳獨怪其神  
今不著響以為英靈漸消散耳偶覽湘中記子胥廟古  
銅器宋元嘉中沙門釋亮啓此廟器鑄丈六金像夜夢  
神語云今捨此器相與發願免此神形豈果由此得解  
脫耶抑釋亮故為此說耶要之佛語謂六道皆有罪業

斯言當不誣耳

狄梁公盡毀諸淫祠獨留泰伯季札伍員而於吳興項王廟馳檄以毀之其胥蠻遂歇今據其文曰鴻名不可以謬假神器不可以力爭應天者膺樂推之名背時者非見幾之主自祖龍御宇橫噬諸侯任趙高以當軸棄蒙恬而齒劍沙邱作禍於前望夷覆滅於後七廟墮圯萬姓屠原鳥思靜於飛塵魚豈安於沸水赫矣皇漢受命玄穹膺赤帝之貞符當四靈之缺運俯張地紐彰鳳



紀之祥仰緝天綱鬱龍興之兆而君潛游澤國嘯聚水鄉矜扛鼎之雄逞拔山之力莫測天符之所會不知歷數之有歸遂奮關中之翼竟垂垓下之翅蓋實由於人事焉有屬於天亡雖驅百萬之兵終棄八千之子以為殷鑒豈不惜哉固當匿魄東峯收魂北極豈合虛承廟食廣費牲牢仁傑受命方隅循革攸寄今遣焚燎祠宇削平臺室使蕙幃銷盡羽帳隨煙君宜速遷勿為人患檄到如律令然吳興項王碑陰有顏魯公題云西楚霸

欽定四庫全書

卷一百七十四

王當秦之末與叔梁避仇吳中蓋今之湖州也雖滅秦而宰制天下其魂魄猶思樂茲邦至今廟食不絕其神靈事跡具竟陵子陸羽所載圖經大厯七年真卿蒙刺是州十二載姦臣伏法恩命進真卿上都剋期首路竟陵是諗予以故碑顛趾嘗因仍草莽已而復之真卿乃命崇樹以紀之時則仲夏方生明之日觀此題則顏公時廟尚在祭祀不絕豈狄公既毀而湖人竟復之耶二公俱以忠直方正名而所見不同如此

今所稱正一嗣教大真人張氏者其始祖天師張道陵  
即張陵也同時張角行天師道持九節杖為符祝教病  
人叩頭思過因以符水飲之陵法略與角同加思靜室  
服罪之人一著山上上之天一埋之地一沈之水謂之  
三官病者家出五斗米故號曰五斗米師角在中國事  
露至反族滅漢亦因以亡而陵在蜀漢用僻故幸不敗  
傳至子衡孫魯遂據巴漢垂三十年曹操破之始請降  
封侯萬戶五子皆侯傳國累葉至唐宋間復世掌道教

繡玉繡傳遂與宣聖之裔相終始而寵幸時過之良可笑也

李膺蜀記云張陵避病瘡於邱社中得呪鬼術書為是遂解使鬼法入鵠鳴山自稱天師漢熹平末為蟒蛇所喻子衡奔走尋屍無所乃假設權方以表靈化生縻鶴跡置石崖頂到光和二年遣信告曰正月七日天師昇玄都衡為係師衡子魯為嗣師以法惑亂天下然則今之所傳張道陵者乃蛇腹之餘食耳李膺非元禮漢蓋

有兩張衡兩李膺也

宋崇寧時蚩尤神壞鹽池帝勅天師張虛靖召關侯勝之鹽池復故封侯為真君今所傳祠廟尚有破蚩尤畫壁按黃帝經序云黃帝殺蚩尤其血化為鹵今之解池是也則蚩尤之主鹽池其說久矣

今人稱玉皇曰張大帝又曰祠山張大帝酉陽雜俎載其事尤可笑云天帝劉翁者惡張翁欲殺之張翁蓄一白雀恒先期為備劉翁自下觀之張翁盛陳賓主醉其

從官策乘龍上天塞北門劉翁徘徊不能上乘其餘龍  
人間為災張翁患之封之太山及覽殷芸小說晉咸康  
中周興死而復生天帝召見升殿仰視紫氣鬱鬱面方  
一尺問左右曰是古張天帝耶答曰上古天帝久已仙  
去此是近曹明帝耳

太宗嘗夢二神人言南處海濱來輔家國明日禮官言  
閩中靈濟二真君事遂遣使函香請神像於宮城西南  
作宮祀之英宗初加封九天金闕明道達德大仙顯靈

普濟清微洞玄沖虛妙感慈惠護國庇民崇福洪恩真  
君九天玉闕宣化扶教上仙昭靈博濟高明弘靜沖湛  
妙應仁惠輔國佑民隆福洪恩真君記文稱二神皆南  
唐義祖之子一名知證封江王一名知諤封饒王按南  
唐書江王知證後進封魏王元宗時猶在入宮行家人  
禮卒年四十三饒王知諤為金陵尹進封梁王博采奇  
物寶貨充牣嘗以五十萬錢易蜀客鳳頭朱冠紺毛金  
喙星眼文彩如生人咸異之後遊桂林山陰地為廣場編

虎皮為大幄率僚屬會於下號曰虎帳忽暴風飄帳碎如飛蝶知諤驚遽棄歸數日卒二子事如此耳其神與否吾不得而知也但生既無功德於民死又無禦災捍患可見之跡而禮崇聖朝爵亞上帝不亦負乘之至幸者乎

今天下所最崇重者太嶽太和山真武及岱嶽碧霞元君當永樂中建真武廟於太和幾竭天子之府庫設大璫及藩司守之而二廟歲入香銀亦以萬計每至春時




中國焚香者傾動郡邑真武號百字有混元六天傳法  
教主修真悟道濟度羣迷普為衆生消除災障八十二  
化三界祖師大慈大悲救苦救難三元都總管九天游  
奕使左天罡北極右垣大將軍鎮天助順真武靈應福  
德行慶仁慈正烈協運真君治世福神玉虛師相玄天  
上帝金闕化身蕩魔天尊叙其得道之由以為在此山  
然大略掇拾佛氏修行之跡而已真武蓋北方玄武之  
神以避宋宣祖諱故名真武龜蛇亦取北方像耳而加

之以大將軍號又碧霞元君者其說起於華山上有小石池水冬夏不涸因名之曰玉女洗頭盆附會者因謂玉女為王母第三女又轉訛而為太山至使嶽宗之神降若侍衛者俱可笑也且以西嶽之神而據東嶽位以北方之神而據西南方位其事若符契語所謂有其人則有其神信哉

按神異經云西方大荒中有聖人焉長丈其腹圍九尺踐龜蛇戴朱鳥然則後人於大石中得龜蛇像歸之真

武者疑即此徵也真武以此聖人擬之亦可若謂神農  
時有淨樂國王皇后之說尤不經可笑



弇州四部稿卷一百七十四